

Võrokeelitside koorilaulõ ja –säädide konkursi võitsõ Alo Ritsing

29. novvembri õdagu anti Kanepi Seldsimajan Kanepi segäkoori 130. juubõli kontsõrdil üle võrokeelitside koorilaulõ ja –säädide konkursi preemiä' ja tennäti kõiki konkursist osavõtjiti. Konkursitõie hulgast loodõtas löüdä vahtsõt võrokeelist lauluvarra.

Kontsõrdil esinesi muidoki Kanepi segäkuur, a sõnna anti ka koori sõpruskoorilõ Haaslava miihikoirilõ. Muuhulgan esitedi ka konkursi võidulaul „Mõtõ' Võromaast“ ja tõisigi võrokeelitsit laulõ. Et laululuuja' mäletäsi', kon tenno jagati, oll' kingitüisi hulgan ka kotikõnõ esitettü kanepi-šokolaadikommõga.

Konkursi preemiä':

Alo Ritsing – pääpreemiä „Kõgõ parõmb laulupidolaul“ (500 eurot) segäkoorilaulu „Mõtõ' Võromaast“ (sõna' ja muusika Urmas Kalla) sääde iist.

Alo Ritsing – avvuhind „Kõgõ parõmb rahvalaulusääde“ (300 eurot) segäkoorilaulu „Karjane taht kodo“ (Urvastõ khk) sääde iist. Tunnustus hää tekstitudmisõga tett rahvalaulusäädide iist.

Mari Amor – avvuhind (200 eurot) „Ilosa melodia iist“ latsikoorilaulu „Pärlijõgi“ (sõna' Artur Adson) muusiga iist.

Konkursi pääpreemiä saanu Alo Ritsing oll' tunnustusõ üle rõõmsa: „Võidulaulu sääde kiroti Urmas Kalla palvõ pääle. Ma püüdse egät salmi teksti perrä harmoonilidsõlt, rütmilidselt ja tempot muutõn esimuudu lahenda'. Koorilaulusäädide tegemine om hää loomingulinõ vaheldus mu egäpääväelon ja torõ, ku tuu tõnõkõrd ka tunnustust saa.“ Seo laulu jaos olõ-i taa edimäne tunnustaminõ – inne III Umma Pito 2013. aastaga keväjä sai Urmas Kalla umakeelitside laulõ võistlusõl „Uma Laul“ üte pääavvuhindust just seosama laulu iist. „Mu lihtsä ja vöi-olla igävä viiega laulu om Ritsing pall'o põnvambas tennü',“ üteli kontsõrdil kohal olnu Urmas Kalla.

2014. aastaga keväjä välläkuulutõdu võrokeelitside koorilaulõ ja –säädide konkursilõ tull' kokko 27 tüüd. Konkursilõ tull' seokõrd esieränis pall'o rahvalaulusäädit – näid oll' tervelt 16 tükkü. Kõgõ inämb laulõ oll' segäkoorilõ, a laulõ kirotõdi ka miihikoirilõ, naisikoirilõ ja latsikoorilõ.

Žüriin olli' helüluuja Piret Rips-Laul, helüluuja ja dirigent Riivo Jõgi, rahvamuusik Ott Kaasik ja dirigendi' Silja Otsar ja Saidi Tammeorg. Tõie hindamisõ man pidäsi žürii tähtsäs luujidõ professionaalsõt helükeele tundmist; tuu pidi aga kõütümä konkursi mõttõga tetä rikkambas võrokeelist lauilma. Hinnati värskust, hääd muusiga- ja vormitunnõtust ja võrokeelitse teksti kokkopasmist muusikaga.

Sääne konkurss oll' järjekõrran joba kolmas. Varatsõmpi konkurssõ (2009 ja 2011) tõiest om kolmtõist laulu saanu II vai III Uma Pido (2010 ja 2013) kavva ja ka pall'o' tõsõ' konkursilaulu' omma löüdnü kotussõ kuurõ lauluvaran – noist ja tõisist võrokeelitsist laulõst panti 2013. aastagal kokko võrokeeline koorilaulik „Om laul, miä kokko kõüt“.

Žürii tüü oll' hinnada' muusikat; laulõ neländäle Umalõ Pidelõ (2016) nakkas valima lavastaja Kristo Toots üten pido muusigatoimkunnaga. Uma Pido projektijuht Ojari Triinu arvas' tulõvigu pääle mõtõldõn: „Seolt konkursilt saa pidolõ tõõnõlidselt mitmit laulõ ja arvada noist mitte kõik ei olõ' avvuhinnat laulu'...“

Tulõva aastaga keväjä kõrraldadas kontsõrt, kon mitmõ' Võro ja Põlva maakunna koori' astva' üles valikuga konkursitõiest ja neländä Uma Pido laulõst.

Konkursi avvuhinnafondi ja tenosündmüst tugõsi' Eesti Kultuurkapitali rahvakultuuri sihtkapital, Võro ja Põlva ekspertgrupi', Võro vallavalitsus, Rahvakultuuri keskuse Vana Võromaa kultuuriprogramm, Põlvamaa omavalitsuste liit, Võro instituut, Võro selts VKKF, Kanepi segäkuur ja Kanepi vallavalitsus.

Võrokeelitside laulu- ja rahvapitõ traditsiuun sai alostusõ 2008. aastagal; sõs oll' Võrol edimäne pido, 2010 oll' Põlvän tõnõ ja 2013. aastagal Võrol joba kolmas Uma Pido. Neläs pido tulõ 28. mail 2016

Põlvan. Uma Pido om terve vana Võromaa ja timä katsa kihlkunna rahva umakeeline laulupido, kon lauldõn tuntas rõõmu uma rikka kultuuriperänduse ja ummamuudu ilmakaemise üle.

Teedüst saa mano:
Triinu Ojar, Uma Pido projektijuht
tel 533 22 153
www.umapido.ee

Pressiteedüssele omma' mano pant Ülle Harju (Uma Leht) foto':



- Kanepi segäkuur juubõlikontsõrdil. Juhatas dirigent Kalev Lindal.



- Konkursi tulõmuisist and' teedä' Uma Pido vidäjä Triinu Ojar. Tedä assistiiirsevä' Kanepi segäkuur ja 6-kuunõ tüütär Anni.